

四庫全書

史部

欽定四庫全書

史部  
綱目  
卷七十五

詳校官檢討臣羅國俊

編修臣裴謙覆勘

覆校官博士臣劉光第

校對官中書臣龔禔身

謄錄監生臣雷永清

欽定四庫全書

釋史卷七十五

靈壁縣知縣馬驕撰

衛靈公之立

諸臣附


左傳昭公七年衛襄公夫人姜氏無子嬖人媯始生孟縶孔



成子夢康叔謂已立元余使羈之孫圉與史苟相之史

朝亦夢康叔謂已余將命而子苟與孔烝鉏之曾孫圉

相元史朝見成子告之夢孟協晉韓宣子為政聘於諸

侯之歲媯始生子名之曰元孟縶之足不良弱行孔成

子以周易筮之曰元尚享衛國主其社稷遇屯  又

曰余尚立繫尚克嘉之遇屯  之比  以示史朝

史朝曰元亨又何疑焉成子曰非長之謂乎對曰康叔名之可謂長矣孟非也將不列於宗不可謂長且其繇曰利建侯嗣吉何建建非嗣也二卦皆云子其建之康叔命之二卦告之筮襲於夢武王所用也弗從何為弱足者居侯主社稷臨祭祀奉民人事鬼神從會朝又焉得居各以所利不亦可乎故孔成子立靈公十二月

癸亥葬衛襄公

二十

衛公孟縶狎齊豹奪之司寇與

郵有役則反之無則取之公孟惡北宮喜褚師圃欲去之公子朝通於襄夫人宣姜懼而欲以作亂故齊豹北宮喜褚師圃公子朝作亂初齊豹見宗魯于公孟為駟乘焉將作亂而謂之曰公孟之不善子所知也勿與乘吾將殺之對曰吾由子事公孟子假吾名焉故不吾遠也雖其不善吾亦知之抑以利故不能去是吾過也今聞難而逃是僭子也子行事乎吾將死之以周事子而

歸死於公孟其可也丙辰衛侯在平壽公孟有事於蓋  
獲之門外齊子氏帷於門外而伏甲焉使祝鼃寘戈於  
車薪以當門使一乘從公孟以出使華齊御公孟宗魯  
驂乘及闕中齊氏用戈擊公孟宗魯以背蔽之斷肱以  
中公孟之肩皆殺之公聞亂乘驅自闕門入慶比御公  
公南楚驂乘使華寅乘貳車及公宮鴻駟馳于公  
公載寶以出褚師子申遇公于馬路之衢遂從過齊氏  
使華寅肉袒執蓋以當其闕齊氏射公中南楚之背公

遂出寅閉郭門踰而從公公如死鳥折朱鉏宵從竇出  
徒行從公齊侯使公孫青聘于衛既出聞衛亂使請所  
聘公曰猶在竟內則衛君也乃將事焉遂從諸死鳥請  
將事辭曰亡人不佞失守社稷越在草莽吾子無所辱  
君命賓曰寡君命下臣于朝曰阿下執事臣不敢貳主  
人曰君若惠顧先君之好照臨敝邑鎮撫其社稷則有  
宗祧在乃止衛侯固請見之不獲命以其良馬見為未  
致使故也衛侯以為乘馬賓將攝主人辭曰亡人之憂

不可以及吾子草莽之中不足以辱從者敢辭賓曰寡君之下臣君之牧圉也若不獲扞外役是不有寡君也臣懼不免於戾請以除死親執鐸終夕與於燎齊氏之宰渠子召北宮子北宮氏之宰不與聞謀殺渠子遂伐齊氏滅之丁巳晦公入與北宮喜盟於彭水之上秋七月戊午朔遂盟國人八月辛亥公子朝褚師圃子玉霄子高魴出奔晉閏月戊辰殺宣姜衛侯賜北宮喜諡曰貞子賜析朱鉏諡曰成子而以齊氏之墓予之衛侯告



寧于齊且言子石齊侯將飲酒徧賜大夫曰二三子之  
教也苑何忌辭曰與於青之賞必及於其罰在康誥曰  
父子兄弟罪不相及况在羣臣臣敢貪君賜以干先王  
琴張聞宗魯死將往弔之仲尼曰齊豹之盜而孟縶之  
賊女何弔焉君子不食姦不受亂不為利疚於回不以  
回待人不蓋不義不犯非禮公羊傳母兄稱兄兄何以  
不立有疾也何疾爾惡疾  
也穀梁傳盜賤也其曰兄母兄也目衛侯衛侯累也  
然則何為不為君也曰有天疾者不得入乎宗廟輒者  
何也曰兩足不能相過齊謂  
之恭楚謂之跣衛謂之輒  
定十二年夏衛公孟彊

伐曹克郊還滑羅殿未出不退於列其御曰殿而在列  
其為無勇乎羅曰與其素厲寧為無勇

禮記公叔文子升於瑕丘蘧伯玉從文子曰樂哉斯丘

也死則我欲葬焉蘧伯玉曰吾子樂之則瑗請前

世本衛公

叔文子作鞞軸

說苑衛叔孫文子問於王孫夏曰吾

先君之廟小吾欲更之可乎對曰古之君子以儉為禮

今之君子以汰易之夫衛國雖貧豈無文履一  
奇以易十稷之繡哉以為非禮也文子乃止 公叔文

子率其子戌請諡於君曰日月有時將葬矣請所以易  
其名者君曰昔者衛國凶饑夫子為粥與國之餓者是

不亦惠乎昔者衛國有難夫子以其死衛寡人不亦貞乎夫子聽衛國之政脩其班制以與四鄰交衛國之社稷不辱不亦文乎故謂夫子貞惠文子○檀弓

左傳

年十三

初衛公叔文子朝而請享靈公退見史鮪而

告之史鮪曰子必禍矣子富而君貪罪其及子乎文子曰然吾不先告子是吾罪也君既許我矣其若之何史鮪曰無害子臣可以免富而能臣必免於難上下同之戍也驕其亡乎富而不驕者鮮吾唯子之見驕而不亡

者未之有也。戊必與焉。及文子率衛侯始惡於公叔戌，以其富也。公叔戌又將去夫人之黨，夫人愬之曰：「戌將為亂。」十四年春，衛侯逐公叔戌，與其黨。故趙陽奔宋，戌來奔。夏，衛北宮結來奔，公叔戌之故也。

新序衛靈公以天寒鑿池，宛春諫曰：「天寒起役，恐傷民。」公曰：「天寒乎？」宛春曰：「君衣狐裘，坐熊席，隩隅有竈，是以不寒。今民衣敝，不補履，決不苴，君則不寒，民誠寒矣。」公曰：「善。」令罷役。左右諫曰：「君鑿池，不知天寒，以宛春知而。」

罷役是德歸宛春怨歸於君公曰不然宛春魯國之匹夫吾舉之民未有見焉今將令民以此見之且春也有善寡人有春之善非寡人之善與靈公論宛春可謂知君之道矣

王孫子昔衛君重裘累茵而坐見路有負薪而哭之者問曰何故也對曰雪下衣薄是以哭之於是衛君懼見於顏色曰為君而不知民孰以我為君於是開府金出倉粟以賑貧窮 衛靈公坐重華之臺侍御數百隨侯

照日羅衣從風仲叔敖入諫曰昔桀紂行此而亡今四境內侵諸侯加兵土地日削百姓乖離今君內寵無乃太盛與靈公再拜曰寡人過矣微子之言社稷幾傾於是出宮女之不進者數百人百姓大說

說苑衛靈公謂孔子曰有語寡人為國家者謹之於廟堂之上而國家治矣其可乎孔子曰可愛人者則人愛之惡人者則人惡之知得之己者亦知得之人所謂不出於環堵之室而知天下者知反之己者也 衛靈公

襜被以與婦人游子貢見公公曰衛其亡乎對曰昔者  
夏桀殷紂不任其過故亡成湯文武知任其過故興衛  
奚其亡也 衛靈公問於史鮒曰政孰為務對曰大理  
為務聽獄不中死者不可生也斷者不可屬也故曰大  
理為務少焉子路見公公以史鮒言告之子路曰司馬  
為務兩國有難兩軍相當司馬執枹以行之一鬪不當  
死者數萬以殺人為非也此其為殺人亦衆矣故曰司  
馬為務少焉子貢入見公以二子言告之子貢曰不識

哉昔禹與有扈氏戰三陳而不服禹於是修教一年而有扈氏請服故曰去民之所事奚獄之所聽兵革之不陳奚鼓之所鳴故曰教為務也

淮南子蘧伯玉為相子貢往觀之曰何以治國曰以弗治治之簡子欲伐衛使史黯往覲焉還報曰蘧伯玉為相未可以加兵固塞險阻何足以致之 蘧伯玉年五

十而知四十九年非何者先者難為知而後者易為攻也 莊子蘧伯玉行年六十而六十化未嘗不始於是之而卒訕之以非也未知今之所謂是之非五十九非



也萬物有乎生而莫見其根有乎出而莫見其門人皆尊其知之所知而莫知恃其知之所不知而後知可不謂大疑乎已乎已乎且無所逃此則所謂然與然乎韓詩外傳外寬而內直自設於隱括之中直已不直人善廢而不悒悒蘧伯玉之行也故為人父者則願以為子為人子者則願以為父為人君者則願以為臣為人臣者則願以為君名昭諸侯天下願焉詩曰彼己之子邦之彥兮此君子之行也

列女傳衛靈公與夫人夜坐聞車聲鞞鞞至闕而止過闕復有聲公問夫人曰知此為誰夫人曰此蘧伯玉也公曰何以知之夫人曰妾聞禮下公門式路馬所以廣敬也夫忠臣與孝子不為昭昭變節不為冥冥惰行蘧

伯玉衛之賢大夫也仁而有智敬以事上此其人必不以闇昧廢禮是以知之公使視之果伯玉也公反之以戲夫人曰非也夫人酌觴再拜賀公公曰子何以賀寡人夫人曰始妾獨以衛為有蘧伯玉爾今衛復有與之齊者是君有二臣也國多賢臣國之福也妾是以賀公

驚曰善哉遂語夫人其實焉

○按夫人即南子耳列女傳記此於仁智而別記南

子於嬖孽則此夫人蓋在南子前拾遺記師涓出於衛靈公之世寫列代之樂造新曲以代古樂故有四時之樂春有離鴻去鴈應蘋之歌夏有明晨焦泉之華流金之調秋有商風白雲落葉吹蓬之曲冬有凝河流陰

沈雲之操以此四時之聲奏於靈公靈公情洒心惑忘於政事蘧伯玉趨階而諫曰此雖以發揚氣律終為沈湎淫漫之音無合於風雅非下臣宜薦於君也靈公乃去其聲而親政務故衛人美其化焉師涓悔其乖於雅頌失為臣之道乃退而隱迹蘧伯玉焚其樂器於九達之衢恐後世傳造焉

莊子顏闔將傅衛靈公太子而問於蘧伯玉曰有人於此其德天殺與之為無方則危吾國與之為有方則危吾身其知適足以知人之過而不知其所以過若然者吾奈之何蘧伯玉曰善哉問乎戒之慎之正汝身哉形莫若就心莫若和雖然之二者有患就不欲入和不欲

出形就而入且為顛為滅為崩為蹶心和而出且為聲  
為名為妖為孽彼且為嬰兒亦與之為嬰兒彼且為無  
町畦亦與之為無町畦彼且為無崖亦與之為無崖達  
之入於無疵汝不知夫螳螂乎怒其臂以當車轍不知  
其不勝任也是其才之美者也戒之慎之積伐而美者  
以犯之幾矣汝不知夫養虎者乎不敢以生物與之為  
其殺之之怒也不敢以全物與之為其決之之怒也時  
其飢飽達其怒心虎之與人異類而媚養已者順也故

其殺者逆也夫愛馬者以筐盛矢以娠盛溺適有蚤蚤僕緣而拊之不時則缺銜毀首碎胸意有所至而愛有所亡可不慎邪

說苑蘧伯玉使至楚逢公子皙濮水之上子皙接草而待曰敢問上客將何之蘧伯玉為之軼車公子皙曰吾聞上士可以託色中士可以託辭下士可以託財三者固可得而託邪蘧伯玉曰謹受命蘧伯玉見楚王使事畢坐談語從容言至於士楚王曰何國最多士蘧伯玉

曰楚最多士楚王大說蘧伯玉曰楚最多士而楚不能用王造然曰是何言也蘧伯玉曰伍子胥生於楚逃之吳吳受而相之發兵攻楚墮平王之墓伍子胥生於楚吳善用之釁蚡黃生於楚走之晉治七十二縣道不拾遺民不妄得城郭不閉國無盜賊蚡黃生於楚而晉善用之今者臣之來逢公子皙濮水之上辭言上士可以託色中士可以託辭下士可以託財以三言者固可得而託身邪又不知公子皙將何治也於是楚王發使一

駟副使二乘追公子皙濮水之上子皙還重於楚蘧伯  
玉之力也故詩曰誰能烹魚漑之釜鬻孰將西歸懷之  
好音此之謂也物之相得固微甚矣

○與聲子椒舉事  
同疑即其事而論

也

戰國策衛靈公近癰疽彌子瑕二人者專君之勢以蔽  
左右復塗偵謂君曰昔者臣夢見君君曰子何夢曰夢  
見竈君君忿然作色曰吾聞夢見人君者夢見日今子  
曰夢見竈君而言君也有說則可無說則死對曰日并

燭天下者也一物不能蔽也若竈則不然前之人煬則後之人無從見也今臣疑人之有煬於君者也是以夢

見竈君君曰善於是因廢癰疽彌子瑕而立司空狗

韓非

子衛靈之時彌子瑕有寵於衛國侏儒有見公者曰臣之夢踐矣公曰奚夢夢見竈者為見公也公怒曰吾聞人主者夢見日美為見寡人而夢見竈乎侏儒曰夫日兼照天下一物不能當也人君兼照一國一物不能壅也故將見人主而夢日也夫竈一人煬焉則後人無從見矣或者一人煬君邪則臣雖夢竈不亦可乎公曰善遂去雍鉏退彌子瑕而用司空狗或曰侏儒善假於夢以見主道矣然靈公不知侏儒之言也去雍鉏退彌子瑕而用司空狗者是去所愛而用所賢也鄭子都賢慶建而壅焉燕子噲賢子之而壅焉夫去所愛而用所賢



未免使一人煬已也不肖者煬主不足以言明今不加知而使賢者煬已則必危矣或曰屈到嗜芟文王嗜菖蒲菹非正味也而二賢尚之所味不必美晉靈侯說參無恤燕噲賢子之非正士也而二君尊之所賢不必賢也非賢而用之與愛而用之同賢誠賢而舉之與用所愛異狀故楚莊用叔孫而霸商辛用費仲而滅此皆用所賢而事相反也燕噲雖舉所賢而同於用所愛衛奚距然哉則侏儒之未見也君壅而不知其壅也已見之後而知其壅也故退壅臣是加知之也曰不加知而使賢者煬已則必危而今已知矣則雖煬已必不危矣

說苑彌子瑕愛於衛君衛國之法竊駕君車罪刑彌子瑕之母疾人聞夜往告之彌子瑕擅駕君車而出君聞

之賢之曰孝哉為母之故犯刑罪哉君遊果園彌子瑕食桃而甘不盡而奉君君曰愛我而忘其口味及彌子瑕色衰而愛弛得罪於君君曰是故嘗矯吾車又嘗食我以餘桃故子瑕之行未必變初也前見賢後獲罪者愛憎之生變也

新序衛靈公之時蘧伯玉賢而不用彌子瑕不肖而任事衛大夫史鮪患之數以諫靈公而不聽史鮪病且死謂其子曰我即死治喪於北堂吾不能進蘧伯玉而退

彌子瑕是不能正君也生不能正君者死不當成禮置尸北堂於我足矣史鮪死靈公往弔見喪在北堂問其故其子具以父言對靈公靈公蹴然易容寤然失位曰夫子生則欲進賢而退不肖死且不解又以尸諫可謂忠而不衰矣於是乃召蘧伯玉而進之以為卿退彌子

瑕徙喪正堂成禮而後返衛國以治

家語史魚病將卒命其子曰吾在衛

朝不能進蘧伯玉退彌子瑕是吾為臣不能正君也生而不能正君則死無以成禮我死汝置屍牖下於我畢矣其子從之靈公弔焉怪而問焉其子以其父言告公公愕然失容曰是寡人之過也於是命之殯於客位進

蘧伯玉而用之退彌子瑕而遠之孔子聞之曰古之列諫者死則已矣未有若史魚死而屍諫忠感其君者也  
可不謂  
直乎

說苑魯哀公問於孔子曰當今之時君子誰賢對曰衛靈公公曰吾聞之其閨門之內姑姊妹無別對曰臣觀於朝廷未觀於堂陛之間也靈公之弟曰公子渠牟其知足以治千乘之國其信足以守之而靈公愛之又有士曰王林國有賢人必進而任之無不達也不能達退而與分其祿而靈公尊之又有士曰慶足國有大事則

進而治之無不濟也而靈公說之史鮪去衛靈公邸舍

三月琴瑟不御待史鮪之入也而後入臣是以知其賢

也

荀子衛靈公有臣曰公孫呂身長七尺面長三尺  
焉廣三寸鼻耳目具而名動天下○恐無此形貌

莊子北宮奢為衛靈公賦斂以為鍾為壇乎郭門之外

三用而成上下之縣王子慶忌見而問焉曰子何術之

設奢曰一之間無敢設也奢聞之既雕既琢復歸於朴

侗乎其無識儻乎其怠疑萃乎芒乎其送往而迎來來

者勿禁往者勿止從其彊梁隨其曲傅因其自窮故朝

夕賦歛而毫毛不挫而况有大塗者乎 仲尼問於太史大弢伯常騫稀韋曰夫衛靈公飲酒湛樂不聽國家之政田獵畢弋不應諸侯之際其所以為靈公者何耶大弢曰是因是也伯常騫曰夫靈公有妻三人同濫而浴史鮪奉御而進所搏幣而扶翼其慢若彼之甚也見賢人若此其肅也是其所以為靈公也稀韋曰夫靈公也死卜葬於故墓不吉卜葬於沙丘而吉掘之數仞得石槨焉洗而視之有銘焉曰不憑其子靈公奪而埋之

夫靈公之為靈也久矣之二人何足以識之

博物志衛靈公葬得

石槨銘曰不逢箕子靈公奪我里

衛襄公無祿即世長子孟絜足疾弱行弗列於宗故元也得以羣臣之推六歲嗣位夢協於筮孔成史朝之流既以宗社之故黜兄而立弟矣善事公孟措以安全此靈公事也乃衛之君臣知廢絜而不知所以處絜盜賊忽發公幾罹禍孟絜被殺公乃委社稷以逃亡幸而北宮反正羣盜出奔是衛之亂盜自起之

盜自止之也靈公在位四十餘年當晉頃定之衰倍  
晉合齊政刑不修而以無道聞胡篋不知而軍旅是  
問任祝鮫王孫賈之流僅以不喪而賢如蘧瑗直如  
史鰌者所稱衛多君子反屈於下位莫能用焉且宣  
姜公之嫡母也南子公之夫人也國母而通於公子  
元妃而淫於宋朝姑婦鶉鵲禮義消亡久矣貽謨不  
臧身死之後父子爭國安在其為元亨也

繹史卷七十五



欽定四庫全書

繹史卷七十六

靈璧縣知縣馬驥撰

楚靈王之亂

說苑楚恭王多寵子而世子之位不定屈建曰楚必多  
亂夫一兔走於街萬人追之一人得之萬人不復走分  
未定則一兔走使萬人擾分已定則雖貪夫知止今楚  
多寵子而嫡位無主亂自是生矣夫世太子者國之基  
也而百姓之望也國既無基又使百姓失望絕其本矣

本絕則撓亂猶免走也恭王聞之立康王為太子其後

猶有令尹圍公子棄疾之亂也

○免走之說亦見尹文慎子諸書中

左傳

襄公二十六年

楚子秦人侵吳及雩婁聞吳有備而還遂

侵鄭五月至于城麋鄭皇頡戍之出與楚師戰敗穿封

戍囚皇頡公子圍與之爭之正於伯州犁伯州犁曰請

問於囚乃立囚伯州犁曰所爭君子也其何不知上其

手曰夫子為王子圍寡君之貴介弟也下其手曰此子

為穿封戍方城外之縣尹也誰獲子囚曰頡遇王子弱

馬戍怒抽戈逐王子圍弗及楚人以皇頡歸卬董父與  
皇頡戍城麋楚人囚之以獻於秦鄭人取貨於卬氏以  
請之子大叔為令正以為請子產曰不獲受楚之功而  
取貨於鄭不可謂國秦不其然若曰拜君之勤鄭國微  
君之惠楚師其猶在敝邑之城下其可弗從遂行秦人  
不予更幣從子產而後獲之

二十九年楚郊敖即位王子

圍為令尹鄭行人子羽曰是謂不宜必代之昌松柏之  
下其草不殖 三十年春王正月楚子使遠罷來聘通

嗣君也穆叔問王子之為政何如對曰吾儕小人食而聽事猶懼不給命而不免於戾焉與知政固問焉不告穆叔告大夫曰楚令尹將有大事子蕩將與焉助之匿其情矣 六月鄭子產如陳涖盟歸復命告大夫曰陳亡國也不可與也聚禾粟繕城郭恃此二者而不撫其民其君弱植公子侈大子卑大夫教政多門以介於大國能無亡乎不過十年矣 楚公子圍殺大司馬蔣掩而取其室申無宇曰王子必不免善人國之主也王子

相楚國將善是封殖而虐之是禍國也且司馬令尹之偏而王之四體也絕民之主去身之偏艾王之體以禍其國無不祥大焉何以得免

三十一  
年衛侯在楚北宮文

子見令尹圍之威儀言於衛侯曰令尹似君矣將有他志雖獲其志不能終也詩云靡不有初鮮克有終終之實難令尹其將不免公曰子何以知之對曰詩云敬慎威儀惟民之則令尹無威儀民無則焉民所不則以在民上不可以終公曰善哉何謂威儀對曰有威而可畏

謂之威有儀而可象謂之儀君有君之威儀其臣畏而  
愛之則而象之故能有其國家令聞長世臣有臣之威  
儀其下畏而愛之故能守其官職保族宜家順是以下  
皆如是是以上下能相固也衛詩曰威儀棣棣不可選  
也言君臣上下父子兄弟內外大小皆有威儀也周詩  
曰朋友攸攝攝以威儀言朋友之道必相教訓以威儀  
也周書數文王之德曰大國畏其力小國懷其德言畏  
而愛之也詩云不識不知順帝之則言則而象之也紂

囚文王七年諸侯皆從之囚紂於是乎懼而歸之可謂  
愛之文王伐崇再駕而降為臣蠻夷帥服可謂畏之文  
王之功天下誦而歌舞之可謂則之文王之行至今為  
法可謂象之有威儀也故君子在位可畏施舍可愛進  
退可度周旋可則容止可觀作事可法德行可象聲氣  
可樂動作有文言語有章以臨其下謂之有威儀也

昭公元年三月甲辰盟楚公子圍設服離衛叔孫穆子曰楚  
公子美矣君哉鄭子皮曰二執戈者前矣蔡子家曰蒲

宮有前不亦可乎楚伯州犁曰此行也辭而假之寡君  
鄭行人揮曰假不反矣伯州犁曰子姑憂子皙之欲背  
誕也子羽曰當璧猶在假而不反子其無憂乎齊國子  
曰吾代二子愍矣陳公子招曰不憂何成二子樂矣衛  
齊子曰苟或知之雖憂何害宋合左師曰大國令小國  
共吾知共而已晉樂王鮒曰小旻之卒章善矣吾從之  
退會子羽謂子皮曰叔孫絞而婉宋左師簡而禮樂王  
鮒字而敬子與子家持之皆保世之主也齊衛陳大夫



其不免乎國子代人憂子招樂憂齊子雖憂弗害夫弗  
及而憂與可憂而樂與憂而弗害皆取憂之道也憂必  
及之大誓曰民之所欲天必從之三大夫兆憂憂能無  
至乎言以知物其是之謂矣

國語虢之會楚公子圍二人執戈先焉蔡公孫歸生與  
鄭罕虎見叔孫穆子穆子曰楚公子甚美不大夫矣抑  
君也鄭子皮曰有執戈之前吾惑之蔡子家曰楚大國  
也公子圍其令尹也有執戈之前不亦可乎穆子曰不

然天子有虎賁習武訓也諸侯有旅賁禦災害也大夫有貳車備承事也士有陪乘告奔走也今大夫而設諸侯之服有其心矣若無其心而敢設服以見諸侯之大夫乎將不入矣夫服心之文也如龜焉灼其中必文於外若楚公子不為君必死不合諸侯矣公子圍反殺邾敖而代之公羊傳此陳侯之弟招也何以不稱弟貶曷為貶為殺世子偃師貶曰陳侯之弟招殺陳世子偃師大夫相殺稱人此其稱名氏以殺何言將自是弑君也今將爾詞曷為與親弑者同君親無將將而必誅焉然則曷為不於其弑焉貶以親者弑然後其罪惡甚春秋不待貶絕而罪惡見者不貶絕以見罪惡也

貶絕然後罪惡見者貶絕以見罪惡也今招之罪已重矣曷為復貶乎此著招之有罪也何著乎招之有罪言楚之託乎討招以滅陳也

左傳令尹享趙孟賦大明之首章趙孟賦小宛之二章事畢趙孟謂叔向曰令尹自以為王矣何如對曰王弱令尹彊其可哉雖可不終趙孟曰何故對曰彊以克弱而安之彊不義也不義而彊其斃必速詩曰赫赫宗周褒姒滅之彊不義也令尹為王必求諸侯晉少懦矣諸侯將往若獲諸侯其虐滋甚民弗堪也將何以終夫以

疆取不義而克必以為道道以淫虐弗可久已矣 楚  
公子圍使公子黑肱伯州犁城犍櫟郊鄭人懼子產曰  
不害令尹將行大事而先除二子也禍不及鄭何患焉  
冬楚公子圍將聘于鄭伍舉為介未出竟聞王有疾而  
還伍舉遂聘十一月己酉公子圍至入問王疾縊而弑  
之遂殺其二子幕及平夏右尹子干出奔晉宮廡尹子  
皙出奔鄭殺大宰伯州犁于郊葬王于郊謂之郊教使  
赴于鄭伍舉問應為後之辭焉對曰寡大夫圍伍舉更

之曰共王之子圍為長 楚靈王即位遠罷為令尹遠  
啓彊為大宰鄭游吉如楚葬邾敖且聘立君歸謂子產  
曰具行噐矣楚王汰侈而自說其事必合諸侯吾往無  
日矣子產曰不數年未能也 年三十月鄭伯如楚子產

相楚子享之賦吉日既享子產乃具田備王以田江南  
之夢 四年春王正月許男如楚楚子止之遂止鄭伯  
復田江南許男與焉使椒舉如晉求諸侯二君待之椒  
舉致命曰寡君使舉曰日君有惠賜盟于宋曰晉楚之

從交相見也以歲之不易寡人願結驩於二三君使舉請聞君若苟無四方之虞則願假寵以請於諸侯晉侯欲勿許司馬侯曰不可楚王方侈天或者欲逞其心以厚其毒而降之罰未可知也其使能終亦未可知也晉楚唯天所相不可與爭君其許之而修德以待其歸若歸於德吾猶將事之况諸侯乎若適淫虐楚將棄之吾又誰與爭公曰晉有三不殆其何敵之有國險而多馬齊楚多難有是三者何鄉而不濟對曰恃險與馬而虞

鄰國之難是三殆也四嶽三塗陽城大室荆山中南九州之險也是不一姓冀之北土馬之所生無興國焉恃險與馬不可以為固也從古以然是以先王務修德音以亨神人不聞其務險與馬也鄰國之難不可虞也或多難以固其國啓其疆土或無難以喪其國失其守宇若何虞難齊有仲孫之難而獲桓公至今賴之晉有里克之難而獲文公是以為盟主衛邢無難敵亦喪之故人之難不可虞也恃此三者而不修德政亡於不暇又

何能濟君其許之紂作淫虐文王惠和殷是以隕周是以興夫豈爭諸侯乃許楚使使叔向對曰寡君有社稷之事是以不獲春秋時見諸侯君實有之何辱命焉椒舉遂請辱晉侯許之楚子問於子產曰晉其許我諸侯乎對曰許君晉君少安不在諸侯其大夫多求莫匡其君在宋之盟又曰如一若不許君將焉用之王曰諸侯其來乎對曰必來從宋之盟承君之歡不畏大國何故不來不來者其魯衛曹邾乎曹畏宋邾畏魯魯衛偏於



齊而親於晉唯是不來其餘君之所及也誰敢不至王  
曰然則吾所求者無不可乎對曰求逞於人不可與人  
同欲盡濟 夏諸侯如楚魯衛曹邾不會曹邾辭以難  
公辭以時祭衛侯辭以疾鄭伯先待于申六月丙午楚  
子合諸侯于申椒舉言於楚子曰臣聞諸侯無歸禮以  
為歸今君始得諸侯其慎禮矣霸之濟否在此會也夏  
啓有鈞臺之享商湯有景亳之命周武有孟津之誓成  
有岐陽之蒐康有艷宮之朝穆有塗山之會齊桓有名

陵之師晉文有踐土之盟君其何用宋向戌鄭公孫僑  
在諸侯之良也君其選焉王曰吾用齊桓王使問禮於  
左師與子產左師曰小國習之大國用之敢不薦聞獻  
公合諸侯之禮六子產曰小國共職敢不薦守獻伯子  
男會公之禮六君子謂合左師善守先代子產善相小  
國王使椒舉侍於後以規過卒事不規王問其故對曰  
禮吾未見者有六焉又何以規宋太子佐後至王田於  
武城久而弗見椒舉請辭焉王使往曰屬有宗祧之事

於武城寡君將墮幣焉敢謝後見徐子吳出也以為貳  
焉故執諸申楚子示諸侯侈椒舉曰夫六王二公之事  
皆所以示諸侯禮也諸侯所由用命也夏桀為仍之會  
有緡叛之商紂為黎之蒐東夷叛之周幽為大室之盟  
戎狄叛之皆所以示諸侯汰也諸侯所由棄命也今君  
以汰無乃不濟乎王弗聽子產見左師曰吾不患楚矣  
汰而愎諫不過十年左師曰然不十年侈其惡不遠遠  
惡而後棄善亦如之德遠而後興 秋七月楚子以諸

侯伐吳宋太子鄭伯先歸宋華費遂鄭大夫從使屈申  
圍朱方八月甲申克之執齊慶封而盡滅其族將戮慶  
封椒舉曰臣聞無瑕者可以戮人慶封唯逆命是以在  
此其肯從於戮乎播於諸侯焉用之王弗聽負之斧鉞  
以徇於諸侯使言曰無或如齊慶封弑其君弱其孤以  
盟其大夫慶封曰無或如楚共王之庶子圍弑其君兄  
之子麋而代之以盟諸侯王使速殺之遂以諸侯滅賴  
賴子面縛銜璧士袒輿觀從之造於中軍王問諸椒舉

對曰成王克許許僖公如是王親釋其縛受其璧焚其  
櫬王從之遷賴於鄢楚子欲遷許於賴使鬬韋龜與公  
子棄疾城之而還申無宇曰楚禍之首將在此矣召諸  
侯而來伐國而克城竟莫校王心不違民其居乎民之  
不處其誰堪之不堪王命乃禍亂也

穀梁傳此入而殺其不言入何也慶封封乎吳鍾離其  
不言伐鍾離何也不與吳封也慶封其以齊氏何也為  
齊討也靈王使人以慶封令于軍中曰有若齊慶封弑

其君者乎慶封曰子一息我亦且一言曰有若楚公子  
圍弑其兄之子而代之為君者乎軍中人粲然皆笑慶  
封弑其君而不以弑君之罪罪之者慶封不為靈王服  
也不與楚討也春秋之義用貴治賤用賢治不肖不以  
亂治亂也孔子曰懷惡而討雖死不服其斯之謂與遂  
繼事也公羊傳此伐吳也其言執齊慶封何為齊誅也  
其為齊誅奈何慶封走之吳吳封之于防然則  
曷為不言伐防不與諸侯專封也慶封之罪何脅齊君  
而亂齊國也春秋繁露楚莊王殺陳夏徵舒春秋貶  
其文不予專討也靈王殺齊慶封而直稱楚子何也曰  
莊王之行賢而徵舒之罪重以賢君討重罪其於人心

善若不貶孰知其非正經春秋常於其嫌德者見其不得也是故齊桓不予專地而封晉文不予致主而朝楚莊弗予專殺而討三者不得則諸侯之得殆此矣此楚靈之所以稱子而討也春秋之辭多所況是文約而法明也問者曰不予諸侯之專封復見於陳蔡之滅不予諸侯之專討獨不復見慶封之殺何也曰春秋之用辭已明者去之未明者著之今諸侯之不得專討固已明矣而慶封之罪未有所見也故稱楚子以伯討之著其罪之宜死以為天下大禁曰人臣之行貶主之位亂國之臣雖不篡殺其罪皆宜死比于此其云爾也

左傳冬吳伐楚入棘櫟麻以報朱方之役楚沈尹射奔命於夏汭箴尹宜咎城鍾離遠啓疆城巢然丹城州來東國水不可以城彭生罷賴之師

新論昔楚靈王驕逸輕下信巫祝之道躬

儻壇前吳人來攻其國人  
告急而靈王鼓舞自若

五年楚子以屈伸為貳於吳

乃殺之以屈生為莫敖使與令尹子蕩如晉逆女過鄭  
鄭伯勞子蕩于汜勞屈生于菟氏晉侯送女于邢丘子  
產相鄭伯會晉侯于邢丘 晉韓宣子如楚送女叔向  
為介鄭子皮子大叔勞諸索氏大叔謂叔向曰楚王汰  
侈已甚子其戒之叔向曰汰侈已甚身之災也焉能及  
人若奉吾幣帛慎吾威儀守之以信行之以禮敬始而  
思終終無不復從而不失儀敬而不失威道之以訓辭



奉之以舊法考之以先王度之以二國雖汰侈若我何  
及楚楚子朝其大夫曰晉吾仇敵也苟得志焉無恤其  
他今其來者上卿上大夫也若吾以韓起為閹以羊舌  
肸為司官足以辱晉吾亦得志矣可乎大夫莫對蘧啓  
疆曰可苟有其備何故不可耻匹夫不可以無備况耻  
國乎是以聖王務行禮不求耻人朝聘有珪享頰有璋  
小有述職大有巡功設机而不倚爵盈而不飲宴有好  
貨殮有陪鼎入有郊勞出有贈賄禮之至也國家之敗

失之道也則禍亂興城濮之役晉無楚備以敗於邲邲之役楚無晉備以敗於鄆自鄆以來晉不失備而加之以禮重之以睦是以楚弗能報而求親焉既獲姻親又欲耻之以召寇讎備之若何誰其重此若有其人耻之可也若其未有君亦圖之晉之事君臣曰可矣求諸侯而糜至求昏而薦女君親送之上卿及上大夫致之猶欲耻之君其亦有備矣不然奈何韓起之下趙成中行吳魏舒范鞅知盈羊舌肸之下祁午張趯籍談女齊梁

丙張骼輔躒苗賁皇皆諸侯之選也韓襄為公族大夫韓須受命而使矣箕襄邢帶叔禽叔椒子羽皆大家也韓賦七邑皆成縣也羊舌四族皆彊家也晉人若喪韓起楊肸五卿八大夫輔韓須楊石因其十家九縣長轂九百其餘四十縣遺守四千奮其武怒以報其大耻伯華謀之中行伯魏舒帥之其蔑不濟矣君將以親易怨實無禮以速寇而未有其備使羣臣往遺之禽以逞君心何不可之有王曰不穀之過也大夫無辱厚為韓子

禮王欲教叔向以其所不知而不能亦厚其禮韓起反鄭伯勞諸圍辭不敢見禮也 冬十月楚子以諸侯及東夷伐吳以報棘櫟麻之役遂射以繁揚之師會於夏洳越大夫常壽過帥師會楚子于瑣聞吳師出遂啓彊帥師從之遽不設備吳人敗諸鵠岸楚子以駟至於羅洳吳子使其弟蹶由犒師楚人執之將以釁鼓王使問焉曰女卜來吉乎對曰吉寡君聞君將治兵於敝邑卜之以守龜曰余亟使人犒師請行以觀王怒之疾徐而

為之備尚克知之龜兆告吉曰克可知也君若驩焉好  
逆使臣滋敝邑休息而忘其死亡無日矣今君奮焉震  
電馮怒虐執使臣將以釁鼓則吳知所備矣敝邑雖羸  
若早修完其可以息師難易有備可謂吉矣且吳社稷  
是卜豈為一人使臣獲釁軍鼓而敝邑知備以禦不虞  
其為吉孰大焉國之守龜其何事不卜一減一否其誰  
能常之城濮之兆其報在邲今此行也其庸有報志乃  
弗殺楚師濟於羅汭沈尹赤會楚子次於萊山遠射帥

繁揚之師先入南懷楚師從之及汝清吳不可入楚子遂觀兵於坻箕之山是行也吳早設備楚無功而還以

蹶由歸楚子懼吳使沈尹射待命于巢遠啓彊待命于

霄婁禮也

韓非子荆王伐吳吳使沮衛蹶融攜於荆師荆將軍曰縛之殺以釁鼓問之曰女來卜乎

答曰卜卜吉乎曰吉荆人曰今荆將以女釁鼓其何也答曰是故其所以吉也吳使臣來也固視將軍將軍怒將深溝高壘將軍不怒將懈怠今也將軍殺臣則吳必警守矣且國之卜非為一臣卜夫殺一臣而存一國其不言吉何也且死者無知則以臣釁鼓無益也死者有知也臣將當戰之時臣使鼓不鳴荆人因不殺也說苑秦楚轂兵秦王使人使楚楚王使人戲之曰子來亦卜之乎對曰然卜之謂何對曰吉楚人曰噫甚矣子之

國無良龜也王方殺子以鑿鐘其吉如何使者曰秦楚  
穀兵吾王使我先窺我死而不還則吾王知警戒整齊  
於鐘死者而有知也吾豈錯秦相楚哉我將使楚之鐘  
鼓無聲鐘鼓無聲則將無以整齊其士卒而理君軍夫  
殺人之使絕人之謀非古之通議也子大夫試孰計之  
使者以報楚王楚王赦之此  
之謂造命○此前事之舛

六年楚公子棄疾如晉報

韓子也過鄭鄭罕虎公孫僑游吉從鄭伯以勞諸祖辭  
不敢見固請見之見如見王以其乘馬八匹私面見子  
皮如上卿以馬六匹見子產以馬四匹見子大叔以馬  
二匹禁芻牧採樵不入田不樵樹不采斂不抽屋不強

句誓曰有犯命者君子廢小人降舍不為暴主不恩賔  
往來如是鄭三卿皆知其將為王也韓宣子之適楚也  
楚人弗逆公子棄疾及晉竟晉侯將亦弗逆叔向曰楚  
辟我衷若何效辟詩曰爾之教矣民胥效矣從我而已  
焉用效人之辟書曰聖作則無寧以善人為則而則人  
之辟乎匹夫為善民猶則之况國君乎晉侯說乃逆之  
徐儀楚聘于楚楚子執之逃歸懼其叛也使遠洩伐  
徐吳人救之令尹子蕩帥師伐吳師于豫章而次于乾



谿吳人敗其師於房鍾獲宮廡尹棄疾子蕩歸罪于遠  
洩而殺之冬叔弓如楚聘且弔敗也

七年楚子之為令

尹也為王旌以田芋尹無宇斷之曰一國兩君其誰堪  
之及即位為章華之宮納七人以實之無宇之闔入焉  
無宇執之有司弗與曰執人於王宮其罪大矣執而謁  
諸王王將飲酒無宇辭曰天子經畧諸侯正封古之制  
也封畧之內何非君土食土之毛誰非君臣故詩曰普  
天之下莫非王土率土之濱莫非王臣天有十日人有

十等下所以事上上所以兵神也故王臣公公臣大夫大夫臣士士臣阜阜臣與與臣隸隸臣僚僚臣僕僕臣臺馬有圍牛有牧以待百事今有司曰女胡執人於王宮將焉執之周文王之法曰有亡荒閱所以得天下也吾先君文王作僕區之法曰盜所隱噐與盜同罪所以封汝也若從有司是無所執逃臣也逃而舍之是無陪臺也王事無乃闕乎昔武王數紂之罪以告諸侯曰紂為天下逋逃主萃淵藪故夫致死焉君王始求諸侯而

則紂無乃不可乎若以二文之法取之盜有所在矣王  
曰取而臣以往盜有寵未可得也遂赦之 楚子成章  
華之臺願與諸侯落之大宰遠啓彊曰臣能得魯侯遠  
啓彊來召公辭曰昔先君成公命我先大夫嬰齊曰吾  
不忘先君之好將使衡父照臨楚國鎮撫其社稷以輯  
寧爾民嬰齊受命于蜀奉承以來弗敢失墮而致諸宗  
祧日我先君共王引領北望日月以冀傳序相授於今  
四王矣嘉惠未至唯襄公之辱臨我喪孤與其二三臣

悼心失圖社稷之不皇況能懷思君德今君若步玉趾  
辱見寡君寵靈楚國以信蜀之役致君之嘉會是寡君  
既受貺矣何蜀之敢望其先君鬼神實嘉賴之豈唯寡  
君君若不來使臣請問行期寡君將承質幣而見于蜀  
以請先君之貺公將往夢襄公祖梓慎曰君不果行襄  
公之適楚也夢周公祖而行今襄公實祖君其不行子  
服惠伯曰行先君未嘗適楚故周公祖以道之襄公適  
楚矣而祖以道君不行何之三月公如楚鄭伯勞于師

之梁孟僖子為介不能相儀及楚不能答郊勞楚子享  
公于新臺使長鬣者相好以大屈既而悔之遂啓疆聞  
之見公公語之拜賀公曰何賀對曰齊與晉越欲此久  
矣寡君無適與也而傳諸君君其備禦三鄰慎守寶矣  
敢不賀乎公懼乃反之

魯連子楚成章華之臺魯君先  
至楚王說之與大曲之弓不琢

之辭已  
而悔之

國語靈王為章華之臺與伍舉升焉曰臺美夫對曰臣  
聞國君服寵以為美安民以為樂聽德以為聰致遠以

為明不聞其以土木之崇高彫鏤為美而以金石匏竹  
之昌大器庶為樂不聞其以觀大視侈淫色以為明而  
以察清濁為聰也先君莊王為匏居之臺高不過望國  
氛大不過容宴豆木不妨守備用不煩官府民不廢時  
務官不易朝常問誰宴焉則宋公鄭伯問誰相禮則華  
元駟駢問誰贊事則陳侯蔡侯許男頓子其大夫侍之  
先君是以除亂克敵而無惡於諸侯今君為此臺也國  
民罷焉財用盡焉年穀敗焉百官煩焉舉國留之數年

乃成願得諸侯與始升焉諸侯皆距無有至者而後使  
大宰啓彊請於魯侯懼之以蜀之役而僅得以來使富  
都那豎贊焉而使長鬣之士相焉臣不知其美也夫美  
也者上下外内小大遠邇皆無害焉故曰美若於目觀  
則美縮於財用則匱是聚民利以自封而瘠民也胡美  
之為夫君國者將民之與處民實瘠矣君安得肥且夫  
私欲弘侈則德義鮮少德義不行則邇者騷離而遠者  
距違天子之貴也唯其以公侯為官正而以伯子男為

師旅其有美名也唯其施令德於遠近而小大安之也若斂民利以成其私欲使民蒿焉忘其安樂而有遠心其為惡也甚矣安用目觀故先王之為臺榭也榭不過講軍實臺不過望氛祥故榭度於大卒之居臺度於臨觀之高其所不奪稽地其為不匱財用其事不煩官業其日不廢時務瘠磽之地於是乎為之城守之木於是乎用之官寮之暇於是乎臨之四時之隙於是乎成之故周詩曰經始靈臺經之營之庶民攻之不日成之經



始勿亟庶民子來王在靈囿鹿鹿攸伏夫為臺榭將以  
教民利也不知其以置之也若君謂此臺美而為之正  
楚其殆矣

新書翟王使使至楚楚王誇使者以章華之臺臺甚高  
三休乃至楚王曰翟國亦有此臺乎使者曰否翟寔國  
也惡見此臺也翟王之自為室也堂高三尺壤陞三象  
節茨弗翦采椽弗刮且翟王猶以作之者大苦居之者

大佚翟國惡見此臺也楚王愧

述異記楚中有宮花草  
狀如金登而甚氤氳花

色紅翠俗說楚靈王時宮人數千皆多愁曠有囚死於宮中者葬之後墓上悉生此花墨子楚靈王好士細腰故靈王之臣皆以一飯為節肱息然後帶扶牆然後起比期年朝有鰲黑之危

左傳八年陳哀公元妃鄭姬生悼太子偃師二妃生公子

留下妃生公子勝二妃嬖留有寵屬諸司徒招與公子

過哀公有癘疾三月甲申公子招公子過殺悼太子偃

師而立公子留夏四月辛亥哀公縊于徵師赴于楚且

告有立君公子勝憇之于楚楚人執而殺之公子留奔

鄭書曰陳侯之弟招殺陳世子偃師罪在招也楚人執

陳行人干徵師殺之罪不在行人也

穀梁傳鄉曰陳公

弟招何也曰盡其親所以惡招也兩下相殺不志乎春秋此其志何也世子云者唯君之貳也云可以重之存焉志之也諸侯之尊兄弟不得以屬通其弟云者親之也親而殺之惡也稱人以執大夫執有罪也稱行人怨

接于上也

陳公子招歸罪于公子過而殺之九月楚公子

棄疾帥師奉孫吳圍陳宋戴惡會之冬十一月壬午滅

陳輿嬖袁克殺馬毀玉以葬楚人將殺之請寘之既又

請私私於幄加絰於顙而逃使穿封戌為陳公曰城麋

之役不諂侍飲酒於王王曰城麋之役女知寡人之及

此女其辟寡人乎對曰若知君之及此臣必致死禮以  
息楚晉侯問於史趙曰陳其遂亡乎對曰未也公曰  
何故對曰陳顛頊之族也歲在鶉火是以卒滅陳將如  
之今在析木之津猶將復由且陳氏得政於齊而後陳  
卒亡自幕至于瞽瞍無遺命舜重之以明德寘德於遂  
遂世守之及胡公不淫故周賜之姓使祀虞帝臣聞盛  
德必百世祀虞之世數未也繼守將在齊其兆既存矣  
穀梁傳惡楚子也  
不與楚滅閔公也  
九年春叔弓宋華亥鄭游吉衛趙

厲會楚子于陳 夏四月陳災鄭裨竈曰五年陳將復  
封封五十二年而遂亡子產問其故對曰陳水厲也火  
水妃也而楚所相也今火出而火陳逐楚而建陳也妃  
以五成故曰五年歲五及鶉火而後陳卒亡楚克有之  
天之道也故曰五十二年

公羊傳陳已滅矣其言陳火何存陳也曰存陳悌矣曷  
為存陳滅人之國執人之罪人殺人之賊葬人之君若

是則陳存悌矣

穀梁傳國曰災邑曰火火不  
志此何以志閔陳而存之也

說苑蔡侯宋公鄭伯朝於晉蔡侯謂叔向曰子亦奚以語我對曰蔡言地計衆不若宋鄭其車馬衣裘侈於二國諸侯其有圖蔡者乎處期年荆伐蔡而殘之

左傳年十一景王問於萇弘曰今茲諸侯何實吉何實凶對曰蔡凶此蔡侯般弑其君之歲也歲在豕韋弗過此矣楚將有之然壅也歲及大梁蔡復楚凶天之道也楚子在申召蔡靈侯靈侯將往蔡大夫曰王貪而無信唯蔡於感今幣重而言甘誘我也不如無往蔡侯不可三

月丙申楚子伏甲而饗蔡侯於申醉而執之夏四月丁  
巳殺之刑其士七十人公子棄疾帥師圍蔡韓宣子問  
於叔向曰楚其克乎對曰克哉蔡侯獲罪於其君而不  
能其民天將假手於楚以斃之何故不克然肝聞之不  
信以幸不可再也楚王奉孫吳以討于陳曰將定而國  
陳人聽命而遂縣之今又誘蔡而殺其君以圍其國雖  
幸而克必受其咎弗能久矣桀克有緡以喪其國紂克  
東夷而隕其身楚小位下而亟暴於二王能無咎乎天

之假助不善非祚之也厚其凶惡而降之罰也且譬之

如天其有五材而將用之力盡而敝之是以無拯不可

沒振

公羊傳楚子虔何以名絕曷為絕之為其誘討也雖誘之則曷為絕之懷惡而討不義君子不予也

殺之

穀梁傳何為名之也夷狄之君誘中國之君而殺之故謹而名之也稱時稱月稱日稱地謹之也

楚

師在蔡晉荀吳謂韓宣子曰不能救陳又不能救蔡物

以無親晉之不能亦可知也已為盟主而不恤亡國將

焉用之秋會于厥憇謀救蔡也鄭子皮將行子產曰行

不遠不能救蔡也蔡小而不順楚大而不德天將棄蔡



以壅楚盈而罰之蔡必亡矣且喪君而能守者鮮矣三年王其有咎乎美惡周必復王惡周矣晉人使狐父請蔡于楚弗許冬十一月楚子滅蔡用隱太子于岡山

申無宇曰不祥五牲不相為用况用諸侯乎王必悔之

公羊傳此未踰年之君也其稱世子何不君靈王不成其子也不君靈公則曷為不成其子誅君之子不立非怒也無繼也惡乎用之用之防也其用之防奈何蓋以築防也穀梁傳此子也其曰世子何也不與楚殺也

一事注乎志所以惡楚子也

楚子城陳蔡不羹使棄疾為蔡公王

問於申無宇曰棄疾在蔡何如對曰擇子莫如父擇臣

莫如君鄭莊公城櫟而寘子元焉使昭公不立齊桓公  
城穀而寘管仲焉至于今賴之臣聞五大不在邊五細  
不在庭親不在外羈不在內今棄疾在外鄭丹在內君  
其少戒王曰國有大城何如對曰鄭京櫟實殺曼伯宋  
蕭毫實殺子游齊渠丘實殺無知衛蒲戚實出獻公若  
由是觀之則害於國未大必折尾大不掉君所知也

國語靈王城陳蔡不羹使僕夫子皙問於范無宇曰吾  
不服諸夏而獨事晉何也唯晉近我遠也今吾城三國

賦皆千乘亦當晉矣又加之以楚諸侯其來乎對曰其在志也國為大城未有利者昔鄭有京櫟衛有蒲戚宋有蕭蒙魯有弁費齊有渠丘晉有曲沃秦有徵衙叔段以京患嚴公鄭幾不封櫟人實使鄭子不得其位衛蒲戚實出獻公宋蕭蒙實殺昭公魯弁費實弱襄公齊渠丘實殺無知晉曲沃實納齊師秦徵衙實難桓景皆志於諸侯此其不利者也且夫制城邑若體性焉有首領股肱至於手拇毛脉大能掉小故變而不勤地有高下

天有晦明民有君臣國有都鄙古之制也先王懼其不帥故制之以義旌之以服行之以禮辨之以名書之以文道之以言既其失也易物之由夫邊境者國之尾也譬之如牛馬處暑之既至蚩蠶之既多而不能掉其尾臣亦懼之不然是三城也豈不使諸侯之心惕惕焉子皙復命王曰是知天咫安知民則是言誕也右尹子革侍曰民天之生也知天必知民矣是其言可以懼哉三年陳蔡及不羹人納棄疾而殺靈王

左傳年十二 楚子謂成虎若敖之餘也遂殺之或譖成虎於楚子成虎知之而不能行書曰楚殺其大夫成虎懷寵也 楚子狩于州來次于潁尾使蕩侯潘子司馬督蹕尹午陵尹喜帥師圍徐以懼吳楚子次于乾谿以為之援雨雪王皮冠秦復陶翠被豹舄執鞭以出僕析父從右尹子革夕王見之去冠被舍鞭與之語曰昔我先王熊繹與呂伋王孫牟燮父禽父並事康王四國皆有分我獨無有今吾使人於周求鼎以為分王其與我乎

對曰與君王哉昔我先王熊繹辟在荆山筭路藍縷以處草莽跋涉山林以事天子唯是桃弧棘矢以共禦王事齊王舅也晉及魯衛王母弟也楚是以無分而彼皆有今周與四國服事君王將唯命是從豈其愛鬲王曰昔我皇祖伯父昆吾舊許是宅今鄭人貪賴其田而不我與我若求之其與我乎對曰與君王哉周不愛鼎鄭敢愛田王曰昔諸侯遠我而畏晉今我大城陳蔡不羹賦皆千乘子與有勞焉諸侯其畏我乎對曰畏君王哉

是四國者專足畏也又加之以楚敢不畏君王哉工尹路請曰君王命剝圭以為鍼秘敢請命王入視之祈父謂子革吾子楚國之望也今與王言如響國其若之何子革曰摩厲以須王出吾刃將斬矣王出復語左史倚相趨過王曰是良史也子善視之是能讀三墳五典八索九丘對曰臣嘗問焉昔穆王欲肆其心周行天下將皆必有車轍馬跡焉祭公謀父作祈招之詩以止王心王是以獲沒於祗宮臣問其詩而不知也若問遠焉其

焉能知之王曰子能乎對曰能其詩曰祈招之悻悻式  
招德音思我王度式如玉式如金形民之力而無醉飽  
之心王揖而入饋不食寢不寐數日不能自克以及於  
難仲尼曰古也有志克己復禮仁也信善哉楚靈王若  
能如是豈其辱於乾谿

禮記工尹商陽與陳棄疾追吳師及之陳棄疾謂工尹  
商陽曰王事也子手弓而可手弓子射諸射之斃一人  
輶弓又及謂之又斃一人每斃一人揜其目止其御曰



朝不坐燕不與殺三人亦足以反命矣孔子曰殺人之

中又有禮焉

○檀弓

國語左史倚相廷見申公子亶子亶不出左史謗之舉伯以告子亶怒而出曰女無亦謂我老耄而舍我而又謗我左史曰唯子老耄故欲見以交倣子若子方壯能經營百事倚相將奔走承序於是不給而何暇得見昔衛武公年數九十有五矣猶箴倣於國曰自卿以下至於師長士苟在朝者無謂我老耄而舍我必恭恪於朝

朝夕以交戒我聞一二之言必誦志而納之以訓道我在輿有旅賁之規位宁有官師之典倚几有誦訓之諫居寢有誓御之箴臨事有瞽史之道宴居有師工之誦史不失書矇不失誦以訓御之於是乎作懿戒以自儆也及其沒也謂之獻聖武公子實不獻聖於倚相何害周書曰文王至于日中昃不皇暇食惠于小民唯政之恭文王猶不敢惰今子老楚國而欲自安也以禦數者王將何為若常如此楚其難哉子亶懼曰老之過也乃

驟見左史 靈王虐白公子張驟諫王患之謂史老曰  
吾欲已子張之諫若何對曰用之實難已之易矣若諫  
君則曰余左執鬼中右執殤宮凡百箴諫吾盡聞之矣  
寧聞它言白公又諫王如史老之言對曰昔殷武丁能  
聳其德至於神明以入於河自河徂亳於是乎三年默  
以思道卿士患之曰王言以出令也若不言是無所稟  
令也武丁於是作書曰以余正四方余恐德之不類茲  
故不言如是而又使以象夢求四方之賢聖得傳說以

來升以為公而使朝夕規諫曰若金用汝作礪若津水  
用女作舟若大旱用女作霖雨啓乃心沃朕心若藥不  
瞑眩厥疾不瘳若跣不視地厥足用傷若武丁之神明  
也其聖之叡廣也其知之不疚也猶自謂未乂故三年  
默以思道既得道猶不敢專制使以象旁求聖人既得  
以為輔又恐其荒失遺忘故使朝夕規誨箴諫曰必交  
修余無余棄也今君或者未及武丁而惡規諫者不亦  
難乎齊桓晉文皆非嗣也還軫諸侯不敢淫逸心類德

音以得有國近臣諫遠臣謗與人誦以自誥也是以其  
入也四封不備一同而至於有畿田以屬諸侯至於今  
為令君桓文皆然君不度憂於二令君而欲自逸也無  
乃不可乎周詩有之曰弗躬弗親庶民弗信臣懼民之  
不信君也故不敢不言不然何急其以言取臯也王病  
之曰子復語不穀雖不能用吾慙寘之於耳對曰賴君  
之用也故言不然巴浦之犀犛兕象其可盡乎其又以  
規為瑱也遂趨而還歸杜門不出七月乃有乾谿之亂

靈王死之

左傳

年十三

楚子之為令尹也殺大司馬遠掩而取其室

及即位奪遠居田遷許而質許圍蔡洧有寵於王王之  
滅蔡也其父死焉王使與於守而行申之會越大夫戮  
焉王奪闚韋龜中犢又奪成然邑而使為郊尹蔓成然  
故事蔡公故遠氏之族及遠居許圍蔡洧蔓成然皆王  
所不禮也因羣喪職之族啓越大夫常壽過作亂圍固  
城克息舟城而居之觀起之死也其子從在蔡事朝吳

曰今不封蔡蔡不封矣我請試之以蔡公之命名子干  
子皙及郊而告之情強與之盟入襲蔡蔡公將食見之  
而逃觀從使子干食坎用牲加書而速行已徇於蔡曰  
蔡公召二子將納之與之盟而遣之矣將師而從之蔡  
人聚將執之辭曰失賊成軍而殺余何益乃釋之朝吳  
曰二三子若能死亡則如違之以待所濟若求安定則  
如與之以濟所欲且違上何適而可衆曰與之乃奉蔡  
公召二子而盟于鄧依陳蔡人以國楚公子比公子黑

肱公子棄疾蔓成然蔡朝吳帥陳蔡不羹許葉之師因四族之徒以入楚及郊陳蔡欲為名故請為武軍蔡公知之曰欲速且後病矣請藩而已乃藩為軍蔡公使須務牟與史狎先入因正僕人殺大子祿及公子罷敵公子比為王公子黑肱為令尹次于魚陂公子棄疾為司馬先除王宮使觀從從師于乾谿而遂告之且曰先歸復所後者劓師及訾梁而潰王聞羣公子之死也自投于車下曰人之愛其子也亦如余乎侍者曰甚焉小人



老而無子知擠于溝壑矣王曰余殺人子多矣能無及此乎右尹子革曰請待于郊以聽國人王曰衆怒不可犯也曰若入於大都而乞師於諸侯王曰皆叛矣曰若亡於諸侯以聽大國之圖君也王曰大福不再祇取辱焉然丹乃歸于楚王泓夏將欲入馮芋尹無宇之子申亥曰吾父再奸王命王弗誅惠孰大焉君不可忍惠不可棄吾其從王乃求王遇諸棘圍以歸夏五月癸亥王縊于芋尹申亥氏申亥以其二女殉而葬之

公羊傳此其弑君其

言歸何歸無惡於弑立也歸無惡於弑立奈何靈王為  
無道作乾谿之臺三年不成楚公子棄疾脅比而立之  
然後令于乾谿之役曰比已立矣後歸者不得復其田  
里衆罷而去之靈王經而死 穀梁傳自晉晉有奉焉  
爾歸而弑不言歸言歸非弑也歸一事也弑一事也而  
遂言之以比之歸弑比不弑也弑君者日不日比不弑  
也

史記右尹度王不用其計懼俱死亦去王亡靈王於是  
獨傍徨山中野人莫敢入王王行遇其故銅人謂曰為  
我求食我已不食三日矣銅人曰新王下法有敢饒王  
從王者罪及三族且又無所得食王因枕其股而卧銅

人又以土自代逃去王覺而弗見遂飢弗能起芋尹申無宇之子申亥曰吾父再犯王命王弗誅思孰大焉乃求王遇王飢於釐澤奉之以歸夏五月癸丑王死申亥家申亥以二女從死并葬之

左傳觀從謂子干曰不殺棄疾雖得國猶受禍也子干曰余不忍也子玉曰人將忍子吾不忍俟也乃行國每夜駭曰王入矣乙卯夜棄疾使周走而呼曰王至矣國人大大驚使蔓成然走告子干子皙曰王至矣國人殺君

司馬將來矣君若早自圖也可以無辱衆怒如水火焉  
不可為謀又有呼而走至者曰衆至矣二子皆自殺丙  
辰棄疾即位名曰熊居葬子干于訾實訾殺囚衣之  
王服而流諸漢乃取而葬之以靖國人使子旗為令尹  
楚師還自徐吳人敗諸豫章獲其五帥平王封陳蔡復  
遷邑致羣賂施舍寬民宥罪舉職召觀從王曰唯爾所  
欲對曰臣之先佐開卜乃使為卜尹使枝如子躬聘于  
鄭且致犂櫟之田事畢弗致鄭人請曰聞諸道路將命

寡君以犂櫟敢請命對曰臣未聞命既復王問犂櫟降  
服而對曰臣過失命未之致也王執其手曰子毋勤姑  
歸不穀有事其告子也他年茅尹申亥以王樞告乃改  
葬之初靈王卜曰余尚得天下不吉投龜詬天而呼曰  
是區區者而不余畀余必自取之民患王之無厭也故  
從亂如歸初共王無冢適有寵子五人無適立焉乃大  
有事于羣望而祈曰請神擇於五人者使主社稷乃徧  
以璧見於羣望曰當璧而拜者神所立也誰敢違之既

乃與巴姬密埋璧於大室之庭使五人齋而長入拜康  
王跨之靈王肘加焉子干子皙皆遠之平王弱抱而入  
再拜皆厭紐鬪韋龜屬成然焉且曰棄禮違命楚其危  
哉子干歸韓宣子問於叔向曰子干其濟乎對曰難宣  
子曰同惡相求如市賈焉何難對曰無與同好誰與同  
惡取國有五難有寵而無人一也有人而無主二也有  
主而無謀三也有謀而無民四也有民而無德五也子  
干在晉十三年矣晉楚之從不聞達者可謂無人族盡

親叛可謂無主無釁而動可謂無謀為羈終世可謂無  
民亡無愛徵可謂無德王虐而不忌楚君子干涉五難  
以弒舊君誰能濟之有楚國者其棄疾乎君陳蔡城外  
屬焉苛慝不作盜賊伏隱私欲不違民無怨心先神命  
之國民信之芊姓有亂必季實立楚之常也獲神一也  
有民二也令德三也寵貴四也居常五也有五利以去  
五難誰能害之子干之官則右尹也數其貴寵則庶子  
也以神所命則又遠之其貴亡矣其寵棄矣民無懷焉

國無與焉將何以立宣子曰齊桓晉文不亦是乎對曰  
齊桓衛姬之子也有寵於僖有鮑叔牙賓須無隰朋以  
為輔佐有莒衛以為外主有國高以為內主從善如流  
下善齊肅不藏賄不從欲施舍不倦求善不厭是以有  
國不亦宜乎我先君文公狐季姬之子也有寵於獻好  
學而不貳生十七年有士五人有先大夫子餘子犯以  
為腹心有魏犢賈佗以為股肱有齊宋秦楚以為外主  
有欒卻狐先以為內主七十九年守志彌篤惠懷棄民



民從而與之獻無異親民無異望天方相晉將何以代

文此二君者異於子干共有寵子國有奧主無施於民

無援於外去晉而不送歸楚而不逆何以冀國

公羊傳比已立

矣其稱公子何其意不當也其意不當則曷為加弒焉

爾比之義宜乎效死不立大夫相殺稱人此其稱名氏

以弒何言將自是為君也穀梁傳當上之辭也當上

之辭者謂不稱人以殺乃以君殺之也討賊以當上之

辭殺非弒也比之不弒有四取國者稱國以弒楚公子

棄疾殺公子比比不嫌也春秋不以嫌代嫌棄疾主其

事故也

釋史

三十七

春秋繁露楚靈王行強乎陳蔡意廣以武不顧其行慮

所美內罷其衆乾谿有物女水盡則女見水滿則不見  
靈王舉發其國而後三年不罷楚國大怒有行暴意殺  
無罪臣成然楚國大憊公子棄疾卒令靈王父子自殺  
而取其國虞不離津澤農不去疇土而民相愛也此非  
盈意之過耶

左傳楚之滅蔡也靈王遷許胡沈道房申於荆焉平王  
即位既封陳蔡而皆復之禮也隱天子之子廬歸于蔡  
禮也悼天子之子吳歸于陳禮也冬十月葬蔡靈公禮

也公羊傳比皆滅國也其言歸何不與諸侯專封也穀梁傳善其成之會而歸之故謹而日之此未嘗有國也使如失國辭然者不與楚滅也變之不莫有三失德不莫弒君不莫滅國不莫然且莫之不與楚滅且成諸侯之事也  
十四年夏楚子使然丹簡上國之兵於宗丘且

撫其民分貧振窮長孤幼養老疾收介特救災患宥孤寡赦罪戾詰姦慝舉淹滯禮新叙舊祿勲合親任良物官使屈罷簡東國之兵於召陵亦如之好於邊疆息民五年而後用師禮也 楚令尹子旗有德於王不知度與養氏比而求無厭王患之九月甲午楚子殺鬬成然

而滅養氏之族使鬪辛居鄖以無忘舊勲

十五年楚費

無極害朝吳之在蔡也欲去之乃謂之曰王唯信子故處子於蔡子亦長矣而在下位辱必求之吾助子請又謂其上之人曰王唯信吳故處諸蔡二三子莫之如也而在其上不亦難乎弗圖必及於難夏蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其為人之異也吳在蔡蔡必速飛去吳所以翦其翼也

國語司馬子期欲以其妾為內子訪之左史倚相曰吾有妾而愿欲笄之其可乎對曰昔先大夫子囊違王之命謚子夕嗜芟子木有羊饋而無芟薦君子曰違而道穀陽豎愛子反之勞也而獻飲焉以弊於鄢芋尹申亥從靈王之欲以隕於乾谿君子曰從而逆君子之行欲其道也故進退周旋唯道之從夫子木能違若教之欲以之道而去芟薦吾子經楚國而欲薦芟以干之其可乎子期乃止

左傳年十六 楚子聞蠻氏之亂也與蠻子之無質也使然

丹誘我蠻子嘉殺之遂取蠻氏既而復立其子焉禮也

公羊傳楚子何以不名夷狄相誘君子不疾也曷為不疾若不疾乃疾之也

十九年 令尹子

瑕言蹶由於楚子曰彼何罪諺所謂室于怒市于色者

楚之謂矣舍前之愆可也乃歸蹶由

二十一年三月葬蔡

平公蔡大子朱失位位在卑大夫送葬者歸見昭子昭

子問蔡故以告昭子歎曰蔡其亡乎若不亡是君也必

不終詩曰不解于位民之攸暨今蔡侯始即位而適卑

身將從之 蔡侯朱出奔楚費無極取貨于東國而謂

蔡人曰朱不用命於楚君王將立東國若不先從王欲

楚必圍蔡蔡人懼出朱而立東國朱懇于楚楚子將討

蔡無極曰平侯與楚有盟故封其子有二心故廢之靈

王殺隱大子其子與君同惡德君必甚又使立之不亦

可乎且廢置在君蔡無他矣殺梁傳東者東國也何為謂之東也王父誘而殺焉

父執而用焉奔而又奔之曰東惡之而貶之也

楚靈昏王也而合諸侯恃其暴也抑晉實不競弭兵

之役委權於楚以至虢之會子圍泄之仍先晉盟設服離衛晉人知其侈汰莫敢與亢焉楚重得志於晉子圍為之也歸國之日弑君自立合諸侯以會于申伐吳滅賴諸侯之師罔不服從曩者晉楚之成以弭兵也今則兵未嘗弭而反以虞夏商周之胤供荆蠻之驅使謂非晉之失計乎慶封齊之亂臣也族誅於吳陳招殺其世子者也執放於越蔡般弑君自立者也誘殺於申三逆殄滅非不義舉然乘釁利禍非能



興問罪之師也朱方既克執慶封以徇於軍曰勿或  
如齊慶封弑其君以弱其孤慶封曰勿或如楚公子  
圍弑其君以奪其國軍人粲然皆笑故懷瑕戮人慶  
封雖死不服也滅陳蔡以為邑用人以為牲憑惡恃  
彊不仁孰甚焉乃民已弗堪而已猶不悟築章華之  
臺崇於匏居之宮自謂美觀不知遠邇之畔離也四  
邑之城形若耦國尾大不掉羣臣諫而弗聽則曰我  
左執鬼中右執殤宮凡百箴諫盡聞之矣直言已塞

禍敗隨之方欲興兵北瞰中原求九鼎於周求許田於鄭而衆怨皆作四族並起莫可如何也郊教靈所縊而弑也而身還自縊幕及平夏靈所殺也而二子還見殺者詬天而呼今投車而泣匍匐棘圍藁葬原野雖欲追踪六王二公之事豈可得乎

釋史卷七十六